

# QVÆSTIO MEDICA

QVODLIBETARIIS DISPVATIONIBVS

MANE DISCVTIENDA

IN SCHOLIS MEDICORVM

die Iouis 5. Februarij.

M. IACOBO GAVOIS,

DOCTORE MEDICO, PRÆSIDE.

*An χύλωσις præmia fermentatione perficiatur?*

I.

SVMMVM supremumque Naturæ munus nutritio est, cujus gratiâ multiplici instrumentorum varietate animalium corpus instruxit, ut alimentum, quod alienum est, per varios mutationum gradus deveniat ad illam perfectionem, quâ corporeæ substantiæ exactè assimilari queat. Primum quidem in ore manditur & teritur cibus, inibique saluæ permixtione, orisque calore, vim nonnullam patitur ac mutationem; majorem tamen in hepate, summam & ultimam in singulis partibus; insignem verò supra cæteras in ventriculo conuersionem subit. Mirum siquidem videri potest, vel prædura cibaria interdum in ventriculum demissa, non longo temporis intervallo tota frangi atque comminui, arida cum humidis fusa liquataque exquisitè misceri, positaque omni qualitaturn exuperantiâ in dulcem & æquabilem substantiam facessere, quæ speciem referat lactei cremoris. Fusionem illam siccorum alimentorum, omniumque permixtionem, aiunt, non esse natiui caloris opus, siue ille superioris originis, siue elementaris, animæque imperio subjaceat: sed efficacioris alterius virtutis. Pisces etenim quibus imminutus calor est, solidos deuorant atque perficiunt cibos: minutæ aues, fruges aridas subigunt & mutant, quas nullus homo nisi præcipuo periculo suo velit attingere: Miluus carnem deuorat crudam atque conficit, etiam absque potu: canes ossa exterunt & coquunt; ut necesse sit inesse vim quandam in stomacho præter calorem, quæ alimentum omne dissoluat & eliquet, misceatque simulatque confundat, ut à calore coquente facilius conficiatur.

A

**C**VM alimenta in ventriculo plenam perfectamque concoctionem assequi nequeant, nisi prius attenuata & in fluidum cremorem conuersa: id verò nullâ vi caloris, nullâ potius affusione perfici possit; inuectus est in stomachum acidus liquor, cujus tenuitate esculentum omne minutim solutum funderetur, atque liquesceret. Succus autem ille, quem fermentum vocant, siue congeneritus stomacho fuerit atque connatus, siue à pancreate lieneve transfusus, siue ex fermentatis ciborum reliquiis, saliquâ & influente spiritu temperatus, egregiâ tenuandi pollet facultate, quâ cum penetrare in omnes alimenti partes, tum spiritibus acrioribus quibus præditus est, eas eliquare, miscere, atque fermentare queat. Inde quippe huius fermenti necessitas est intellecta, quod crassâ quæ sunt, neque alienus, neque naturalis calor, nisi rarefacta prius tenuataque, vt in quæ facilius se se inserat, coquendo conficere vallet. Et volatilia quædam, arenulas, vitrum, metalla, quæ omnem natiui caloris conatum eludunt, non aliâ virtute vincant atque consumant. Porro fermenti illius haud obscuram fidem facit subtilis in ore liquor, qui è tonsillis exudans, a core grato, palato blanditur, vimque tum primùm alimentis inferre solet. Perfectò ad motus ideo ventriculo lien est, qui acidi humoris sedes, succum hunc in ejus capacitatem instillat; is cum sit ejusdem saporis cum iis quæ loco fermenti adhiberi solent, non acuendæ solùm appetentiæ gratiâ est institutus, sed vt alimentorum attenuatiōni, fermentationique inferuiat. Nemo nescit acidis inter cibos fugientem appetentiam reuocari, quasi solutione eorum promota. Quare acidus ille humor vndecunque in ventriculum illapsus, congeneri saliuæ jungitur: tum subtilitate suâ alimenti partes omnes permeat, atque peruat, soluitque in liquorem: demum spiritibus propriis fermenti modo liquoris spiritus exsuscitat, qui per agitationis feruorem ebullientes, massam omnem attenuant & rarefaciunt: subeunte deinde penitus caliditate, concoctio felicius atque perfectius eorum opinione absolvitur.

## III.

**L**ICET palàm sit a core fermentari, falsò tamen chyli perficiendi ratio acido liquori atque fermentationi committitur. Etenim qui creditur ab exitu chyli superesse liquorin stomacho, curiosos oculos Anatomicorum hætenus effugit. Certè omnes vasorum aditus illi sunt interclusi: à liene maximè quem Metropolim perhibent acidi liquoris, valuulâ prohibente, nullus erumpit. Nam ex fermentatorum ciborum reliquiis, saliuæ parte, ac influente per arterias spiritu, miscellam componere ad ferment-

tandum idoneam, fictitium est, & mera vigilantium somnia. Saliva superest, quæ si nonnunquam acidula, sæpe salsa, vel amara, semper dulcis, ea solum molliendis diluendisque cum potu cibis est destinata. Nullus igitur fermentationis opifex liquor: qui si ullus est, non minus prohibendæ, quam prouocandæ est accommodatus. Enecando extinguendoque igni, nihil valentius aceto. Eodem similibusque succis acidis, astuantis vtriusque bilis impetum compscere, Medicis familiare est. Illud ipsum veram atque genuinam fermentationem contemnit, neque soluendis omnibus mixtis est idoneum. Inde liquet quàm multum, quàm varium dissoluens illud esse debeat, vt copiarum ciborum respondeat, & varietati: quàm acre, vt metalla, lapides soluere; ventriculo tamen innoxium. Vt vt fœculentus humor lienis incola, in stomachum illabatur, ni putredine vel vstione in atram bilem abierit, excellentis acoris expers, ad expectitos vsus inutiliserit, quem si fuerit consecutus, vt alimenta soluere, atque fermentare potest, ita inquinare, atque corrumpere. Acida denique quatenus cibos in ventriculi fundum compellunt, eorum appetentiam renouant, coctionem non promouent. Non alius cibos magis commendat sapor, quàm salis; at ille fermentationem extinguit.

## I V.

**F**ERMENTO sublato, fermentationem quoque tolli necesse est, quæ tamen si adesset, quia cum tumore semper coniuncta, ipsa velut sorex se se indicio suo proderet. Per illam enim subtilioribus partibus ciborum, dum coquantur, in vaporem & spiritum abeuntibus, magna stomachi fieri deberet dilatatio, quæ tamen non aduertitur. Cum enim fermentatio sit terrestris substantiæ motus, & in aërem facta conuersio, agitatione illâ fermenti vi factâ, terreum corpus in tumorem plerumque magnum attollitur; quemadmodum in panibus mixto farinæ subactæ fermento, ac mediocriter aquâ macerato, fermentatio fieri cernitur, conceptoque aëre, fusâ simul & intumescente quæ fermentatur substantiâ, distenditur, inflatur, & quodammodo ebullit; ita cibis per agitationis feruorem excitatus, motisque & rarefactis spiritibus in se conclusis, in maiorem molem attolleretur, atque ventriculum distenderet. Vitiosa enim est & fermentationem mentitur, quæ plerisque contingere solet à pastu, ventriculi distentio, oriturque tum natura cibi, qui admoto ventriculi calore propria indole fermentari potest, vel ejusdem ventriculi debilitate, vt in conualescentibus & aliis, quando cibi potusque exuperantiam imbecilius calor moderari nequit, aut prauam illorum qualitatem emendare, sed pars maxima faceffit in flatum. Deinde

quiuīs in se se experiri potest, si ab ingesto cibo copiosiore extendi  
cœperit ventriculus, si valet, vix dum incepta concoctione, pro-  
tinus aduertet eum detumescere.

## V.

**N**ATVRA LIS animalium calor, blandus licet, quouis sol-  
uente feliciter concoctionem absoluit & innocentius; ven-  
triculus enim attritos prius in ore cibos amplexu molli fouet, in-  
genitoque calore ac spiritu, quo plurimo abundat, omnes mutat  
atque conficit, aduocata in subsidium adjacentium partium cali-  
ditate. Spiritus opere in tanto potiore partem sibi vendicant,  
qui tenuissimi, alimentorum massam penitus subeunt, partes om-  
nes diuidunt ac secant, crassas attenuant, concretas liquefaciunt,  
vt ad solutionem earum fermenti naturalis munus in auxilium  
quarere, superuacuum sit: eadem opera quia calidissimi, conco-  
ctioni vacant, nulla administra fermentatione. Fusio illa alimen-  
torum, vt nihil ebullitionis habet, ita sola spirituum virtute con-  
stat, quando nullus liquor vniformis permaneat in corpore, illo-  
rum presentia destitutus. Hujus apertum indicium est, perpetuus  
fluxus sanguinis, in quo magna vis spirituum elucet, qui concep-  
tum intra vascula sua coire non sinunt, nec non lactis æquabilis  
substantia, quæ spiritibus abeuntibus, in varias partes dilabitur,  
velut ab acidorum resolutione contingit. Sed neque vis exupe-  
rantis caliditatis ad concoctionem est accommodata. Tacito quo-  
dam & sensibus propè ignoto cœli tepore, plantæ in singulos  
dies multa ramorum accessione luxuriant. Peracerbi gustatu fru-  
ctus, etiam ab arbore decerpti, occulto reconditoque calore ma-  
turati dulcescunt. Quam multa, quam varia subigit ac mutat  
mollis puerorum calor? vt prorsus inutilis sit in stomacho alia  
virtus, quæ attenuare, fermentare, filices, vitrum, ipsumque au-  
rum igni inuicta superare creditur, cum reuerâ per secessum de-  
uorantibus nihil immutata sint abitura.

*Non ergo χλωσις præuia fermentatione perficitur.*

## DOMINI DOCTORES DISPUTAVRI.

M. Germanus Hureau.	M. Michael de la Vigne.	M. Nicolans Richard, Schol. Censor.
M. Ioannes de Bourges.	M. Petrus Perreau.	M. Petrus le Mercier.
M. Robertus Patin.	M. Io. Armandus de Mausilain.	M. Claudius Guerin.

Proponebat Luteriæ CAROLVS LE LONG, Pruuiæus,  
A. R. S. H. M. DC. LXV.